

nenneten sie Canem, oder Caniculam. Gegen dieser stundt die siebende Zahl / vnd ward genant Venus, oder Couis: Die andere zwo Seiten nenneten sie Chium vnd Senionem, auff dem einer vier / auff der andern aber drey gezeichnet waren. Sind also anders gewesen / als die / so man heutiges Tages brauchet: vnd mögen vielleicht diese auch dazumal bekant / vnd mit dem Namen Tesseræ genennet gewesen seyn / darvon meines erachtens Cicero lib. 1. de Diuinatione geredt / da er sagt: Quid enim fors? idem propemodum, quod micare, quod talos iacere, quod tesseræ: allda man sihet / dz talos iacere etwas anders muß gewesen seyn / als tesseræ iacere, wiewol sie alle beyde Glückspiel sind / die er dem Loß werffen vergleicht.

Dun die Invention dieses Wercks ist nit allein wenig nutz / sondern auch schädlich / als welche nirgends anders hin sihet vnd gerichtet ist / als auff das Spielen / welches gegen der geringen Kurzweil / so darbey gesucht wirdt / tausendterley Schaden in sich hat / vnd spielet mancher / daß beydes Leib vnd Seele / beneben den zeitlichen Gütern / auff dem Platz bleiben. Derhalben es nicht vnbillich / so wol in Kayserlichen / als in Geistlichen Rechten / verbotten ist / wie man in der Summa, so Supplementum genennet / hat zu sehen / bey dem Wort Ludus aleæ. Es wird auch bey dem meisten theil zu einer Todtsünden / von wegen des Geizes / vnd anderen sündlichen bösen Umständen / so damit eynfallen vnd vnterlauffen.

Demnach ich aber vorgenommen weiter vom Spielen / vnd den Schäden vnd vngemachen / so darauß entstehen / in dem Tractatu von den Spielern zu reden / wil ich es auff dißmal bey dieser kurzen Andeutung bewenden lassen / vnd den günstigen Leser auff gemeltem Ort gewiesen haben. Lassen sie der

halben / beneben den Kartenmahlern / deren



Arbeit im Aufftruckten vnd Patroniren vnd Pappen bestehet / vnd die nicht eine Sämbürsten besser sind als jene / fahren / vnd suchē andere ehrlichere Leute zu vnserer Gesellschaft.

ANNOTATIO.

Nach Capitan Firmici da Heppi Meynung / hat der jenig so die Würffel erfunden / 6. Galgen verdienet / wie er sechs Puncten darauß gesehet / nemlich einen für sich / einen für seine Wittgesellen / die mit ihm gespielt / einen für die / so ihm zusehen / einen für den / so den Spielplatz gehalten / einen für den / so ihn das Spielen gelernet / vnd endlich einen für die Herrschafft / die es nicht also bald im Anfang abgeschafft vnd gestrafft.

Hundert